



UNIVERSITÄTS-  
BIBLIOTHEK  
PADERBORN

## **Universitätsbibliothek Paderborn**

### **Epistolarvm Innocentii III. Romani Pontificis Libri Vndecim**

**Innozenz <III., Papst>**

**Parisiis, 1682**

Abbati Et Conventvi sancti Medardi Sussionensis.

**urn:nbn:de:hbz:466:1-20020**

denter & sollicitè debuerunt juxta legitimas & canonicas sanctiones. Volentes igitur ut quod semiplenè factum est, per vestram diligentiam suppleatur, attestationes ipsas sub bulla nostra vobis transmittentes inclusas, presentium auctoritate mandamus quatinus eosdem testes jam pridem ab utraque parte productos vestro faciatis conspectui presentari, ad hoc eos, si opus fuerit, per censuram ecclesiasticam compellendo; quibus sub debito prestiti juramenti & excommunicationis pena firmiter injungatis ut plenam & meram dicant de omnibus veritatem super quibus à vobis fuerint requisiti, vosque tam super circumstantiis prenotatis quam aliis negotium contingentibus inquirentes diligentissimè veritatem, universa studiose conscripta sub sigillis vestris nobis fideliter transmittatis, partibus injungendo ut ad presentiam nostram per se vel procuratores idoneos veniant sic instructi ut attestacionibus publicatis sententiam à nobis Domino auctore reportent. Quòd si non omnes &c. duo vestrum &c. Datum Laterani xii. Kal. Maij, pontificatus nostri anno duodecimo.

*RATISPONENSI EPISCOPO.*

*Epist. 24.  
De reformationis  
abusibus in  
clero.*

**C**Vra te pastoralis officij exhortatur ut circa commissum tibi gregem ita diligenter invigiles quòd non possis de negligentia reprehendi. Sanè ad nostram noveris audientiam pervenisse quod Plebani de rure tuæ diocesis & quidam eorum Decani, qui eos deberent corrigere & ad penitentiam revocare, cohabitationibus manifestis polluti, cum ad generalem synodum singulis annis accedunt, excessus suos nequiter occultantes, & se invicem confoventes, nihil inter se denuntiant, & sic in detrimentum animarum suarum & scandalum plebis in suo peccato permanent pertinaces. Præterea Milites quidam, qui se asserunt de suis excessibus non debere sacerdotum judicio subiacere, adulteria, incestus, & alia peccata committunt impune, nec etiam corriguntur. Plurimi etiam virorum, mulierum, ac puerorum, qui pro sacramento confirmationis percipiendo ad episcopalem sedem non consueverunt accedere, indifferenter decedunt sine susceptione hujusmodi sacramenti. Cum igitur eorum diocesanus existas, & ex injuncto tibi officio tuam debeas parochiam visitare, ac tamquam proprius medicus unde illis infirmitates eveniant cognoscere tenearis, fraternitati tuæ per

apostolica scripta mandamus quatenus per te ipsum ad inquisitionem infirmitatum hujusmodi & curationem ipsarum sollicitudine diligenti procedas; quia si putredinem vulneris apertione non cicis, sana caro nequaquam in loco putredinis coalescet. Ceterum cum nemo teneatur suis stipendiis militare, nec bovi os claudi debeat trituranti, presentium tibi auctoritate concedimus quatinus cum propter hoc tuam duxeris dioecesim visitandam, liceat tibi moderatam procuracionem percipere; ita quidem quòd ex hoc Ecclesiæ non graventur, sed potius per adventum tuum suscepisse se gaudeant tam in spiritualibus quam in temporalibus incrementa. Datum Laterani xi. v. Kalen. Maij, anno duodecimo.

*E I D E M.*

**E**X parte tua fuit propositum coram nobis quòd Ratipsonensis Ecclesiæ ac aliorum episcopatum Canonici, qui nolunt in parrochiis suis, quas habent in tua dioecesi, residentiam facere, ut tenentur, vicarios instituunt in eisdem; qui cum nec ad Archidiaconum vel Decanum respectum habeant, correctionem nolunt aliquam pro suis excessibus sustinere. Quare nobis humiliter supplicasti quòd, ne ipsæ Ecclesiæ debito servitio defraudentur, tibi licentiam concedere dignemur ut auctoritate nostra fraternitati tuæ liceret perpetuos instituire vicarios in eisdem. Cum igitur honori sit onus annexum, & exequi debeat officium qui beneficium est sortitus, fraternitati tuæ per apostolica scripta mandamus quatenus Canonicos ipsos ad debitam in eisdem parrochiis residentiam faciendam, vel saltem idoneos vicarios instituendos in illis, per quos dictis parrochiis debita servitia impendantur, monitione præmissa per censuram ecclesiasticam appellatione remota compellas. Datum ut in alia.

*ABBATI ET CONVENTUI  
sancti Medardi Sueslionensis.*

**C**Vm ad supplicis petitionis instantiam Mariæ pauperis mulieris dadum vobis direxerimus scripta nostra ut . . . puero nato ejus victum & vestitum liberaliter ministrantes, erudiri faceretis eundem in scientia litterali, vos, sicut præfata mulier iterata nobis supplicatione monstravit, mandatum apostolicum circa puerum memoratum juxta pium ejus desiderium non impletis. Nolentes igitur hoc pietatis opus

*Epist. 24.  
De Circa  
non infirmo  
luc.*

*Epist. De  
circa  
luc.*

*Epist. 24.  
De puerum  
quodam  
monasterio  
admittant.*

*Epist. 24.  
De puerum  
quodam  
monasterio  
admittant.*

opus relinquere imperfectum, per iterata vobis scripta mandamus & districtè præcipimus quatinus dictum puerum apud monasterium vestrum in literali pariter & morali scientia prompta facientes instrui caritate, ac interim in victu & vestitu providentes eidem, cum ad quintumdecimum annum pervenerit, ipsum in fratrem & monachum admittatis. Alioquin, ne vel ejus vel prædictæ suæ matris anima in dubium suspendatur, quæ gravis infirmitatis incommodo fatigata, circa provisionem ejusdem pueri minus commode potest maternæ sedulitatis officium exhibere, venerabili fratri nostro Archiepiscopo Remensi & dilectis filiis Abbati Longipontis Suesionensis diocesis & Cantori Remensi dedimus in præceptis ut vos ad id monitione præmissa per censuram ecclesiasticam appellatione remota compellant. Datum Laterani xi. Kal. Maij, anno duodecimo.

*Scriptum est illis super hoc.*

## ILLVSTRI REGI FRANCIE.

**I**llud quod quidam ad injuriam tuam referunt & incommodum tigni tui, ad utriusque procul dubio redundat gloriam & profectum, cum videlicet ingens laus & grandis honor tibi simul & regno ipsi provenerit ex eo quod inter alios mundi Reges & regna pro communibus necessitatibus & utilitatibus universalis Ecclesiæ seu etiam populi Christiani & recursum ad te specialiter sit ac illud, & potenter eis sit ab utroque succursum. Propter quod, ut recentia ponamus exempla, gloriam tuam & potentiam regni tui titulis hoc illustret insignibus quod per Constantinopolitani acquisitionem & detentionem imperij ac subsidia & præsidia terræ sanctæ necnon adjumenta fidei orthodoxæ magnanimitate tuorum fortium procurante, ipsos quasi præcipuos visa est iis temporibus Latinitas habuisse quos adversus Græciam insolentem opponeret aut gentem incredulam seu etiam hæresim sævientem; ut jam penè de omni quæ sub cælo est natione non desit qui victricem manum tuam fortiumque tuorum vel non laudet in aliis, vel non formidet expertus. Sed & nunc cælesti consilio, sicut creditur, est provisum quod cetero terrarum orbe postposito, de tuo specialiter regno, quasi de publico virorum thesauro, vir quaeritur qui Ierosolymitani regni gubernaculo præferatur, dilecto filio nobili viro Iohanne Brenensi Comite ad dilectæ in Christo filie [Mariæ] ipsius regni Dominae conjuga  
Tom. II.

gium evocato; quasi te simul & regnum tuum specialiter in hoc velit Rex altissimus honorare, ut is qui subditus tuus erat, regnum suæ peculiaris hereditatis accipiat, & orientali provinciæ in urgente necessitate succurrat. Quapropter nos pro nihilo reputato quod dicimur à quibusdam regnum tuum prædictorum prætextu viris & viribus destituere ac ope simul & opibus vacuare, serenitatem regiam ad promotionem hujus negotij securè duximus exhortandam, cum ex hoc potior tibi salus & regno ipsi major speretur prosperitas proventura. Quod profectò cum inter cetera regna mundi à temporibus quorum non extat memoria pro catholicissimorum progenitorum tuorum meritis multa sit rerum ac temporum fecunditate gavisum, sub tuo demum felici regimine directus est Dei munere mundi cursus prosperis circa ipsum, ut inter ceteros mundi Reges pro tuis magnificis gestis præfulgeas gloriosus, sola denique, quod tristes referimus, causa conjugij maculam in gloria tua posuit, quam utinam fatagas abolere, ut totus omnino ab omni macula sis immunis. Rogamus ergo regalem mansuetudinem & exhortamur attentius, in remissionem tibi pecaminum injungentes, quatinus urgentissima terræ sanctæ necessitate prospecta, injuriosum vel damnosum non reputans quod proculdubio tibi est honorabile ac perutile regno tuo, præfato Comiti ad procedendum in hoc non solum impendas auxilium per te ipsum, sed per tuos facias exhiberi. Nos enim, ut quod super ipso negotio maxime pro terræ sanctæ subventionem aliis suademus, ipsi quoque in affectu gerere comprobemur, præter alia quæ quantum desuper nobis datur eidem terræ multifariè multisque modis auxilia procuramus, summam mille quadringentarum marcharum, in quibus nobis Comes ipse tenetur, in utilitatem prædictæ terræ ita providimus largiendam ut persoluta ea fratribus Templi & Hospitalis ab ipso, per eos deferatur ad illam, & tandem in utilitatem prædictam cum consilio venerabilis fratris nostri Patriarchæ Ierosolymitani necnon magistrorum Hospitalis & Templi & ipsius Comitis expendatur. Ad hæc, cum, sicut pro certo comperimus, litteræ nostræ tibi sæpe minus fideliter exponantur, in hoc esse te volumus de cetero cautiorem, cum vitiosus interpres aliquando minus, interdum plus, nonnunquam verò aliud & aliter quam in ipsis contineatur exponat, culpabiliter te decipiens,  
R r